

太
宏
大
師
全
書

于
右
任
題
印

B94
20101
12

太虛大師全書
(太虛菩薩藏)

法藏：法界圓覺學
(五)

善導寺佛經流通處印行



維摩詰所說不可思議解脫經釋會紀聞下

辛一 淨名總問

「爾時、維摩詰謂衆菩薩言：『諸仁者！云何菩薩入不二法門！各隨所樂說之』」。

〔紀〕 此章衆字、諸字、名字，皆表總問概括之詞。隨所樂三字，即各各精神獨——即不二——到處，亦即各各所入之不二法門也。

辛二 各入不二

壬一 就言入不二法門

會中有菩薩名法自在，說言：「諸仁者！生、滅爲二，法本不生，今則無滅；得此無生法忍，是爲入不二法門」。德守菩薩曰：「我、我所爲二，因有

我故便有所，若無有我則無我所，是爲入不二法門」。不眇菩薩曰：「受、不受爲二，若法不受則不可得，以不可得故無取無捨、無作無行，是爲入不二法門」。德頂菩薩曰：「垢、淨爲二，見垢實性則無淨相，順於滅相，是爲入不二法門」。善宿菩薩曰：「是動、是念爲二，不動則無念，無念即無分別，通達此者，是爲入不二法門」。普眼菩薩曰：「一相、無相爲二，若知一相即是無相，亦不取無相，入於平等，是爲入不二法門」。妙臂菩薩曰：「菩薩心、聲聞心爲二，觀心相空如幻化者，無菩薩心、無聲聞心，是爲入不二法門」。弗沙菩薩曰：「善、不善爲二，若不起善、不善，入於無相際而通達者，是爲入不二法門」。師子菩薩曰：「罪、福爲二，若達罪性則與福無異，以金剛慧決了此相，無縛、無解者，是爲入不二法門」。師子意菩薩曰：「有漏、無漏爲二，若得諸治等，則不起漏、不漏想，不著於相，亦不住無相，是爲入不二法門」。淨解菩薩曰：「有爲、無爲爲二，若離一切數則心如虛空，以清淨慧無所礙者，是爲入不二法門」。那羅延菩薩曰：「世間、出世間爲二，世間

性空即是出世間，於其中不入、不出、不溢、不散，是爲入不二法門」。善意菩薩曰：「生死、涅槃爲二，若見生死性則無生死，無縛、無解，不然、不滅。如是解者是爲入不二法門」。現見菩薩曰：「盡、不盡爲二，法若究竟，盡若不盡皆是無盡相，無盡相即是空，空則無有盡、不盡相。如是入者，是爲入不二法門」。普守菩薩曰：「我、無我爲二，我尚不可得，非我何可得？見我實性者不復起二，是爲入不二法門」。電天菩薩曰：「明、無明爲二，無明實性即是明，明亦不可取，離一切數，於其中平等無二者，是爲入不二法門」。喜見菩薩曰：「色、色空爲二，色即是空，非色滅空，色性自空。如是受、想、行、識，識、空爲二，識即是空，非識滅空，識性自空。於其中而通達者，是爲入不二法門」。明相菩薩曰：「四種異、空種異爲二，四種性即是空種性，如前際、後際空故中際亦空。若能如是知諸種性者，是爲入不二法門」。妙意菩薩曰：「眼、色爲二，若知眼性於色不貪、不恚、不癡，是名寂滅。如是耳聲、鼻香、舌味、身觸、意法爲二，若知意性於法不貪、不恚、不癡，是名

寂滅。安住其中，是爲入不二法門」。無盡意菩薩曰：「布施、迴向一切智爲二，布施性即是迴向一切智性。如是持戒、忍辱、精進、禪定、智慧、迴向一切智爲二，智慧性即是迴向一切智性，於其中入一相者，是爲入不二法門」。深慧菩薩曰：「是空、是無相、是無作爲二，空即無相，無相即無作；若空、無相、無作，則無心、意、識。於一解脫門即是三解脫門者，是爲入不二法門」。寂根菩薩曰：「佛、法、衆爲二，佛即是法，法即是衆，是三寶皆無爲相，與虛空等。一切法亦爾。能隨此行者，是爲入不二法門」。心無礙菩薩曰：「身、身滅爲二，身即是身滅，所以者何？見身實相者，不起見身及見滅身，身與滅身無二、無分別。於其中不驚、不懼者，是爲入不二法門」。上善菩薩曰：「身、口、意善爲二，是三業皆無作相。身無作相即口無作相，口無作相即意無作相，是三業無作相即一切法無作相。能如是隨無作慧者，是爲入不二法門」。福田菩薩曰：「福行、罪行、不動行爲二，三行實性即是空，空則無福行、無罪行、無不動行。於此三行而不起者，是爲入不二法門」。華嚴菩薩

曰：「從我起二爲二，見我實相者不起二者，若不住二法則無有識，無所識者是爲入不二法門」。德藏菩薩曰：「有所得相爲二，若無所得則無取捨，無取捨者是爲入不二法門」。月上菩薩曰：「闇與明爲二，無闇、無明則無有二，所以者何？如入滅受想定無闇、無明，一切法相亦復如是。於其中平等入者，是爲入不二法門」。寶印手菩薩曰：「樂涅槃、不樂世間爲二，若不樂涅槃、不厭世間則無有二。所以者何？若有縛則有解，若本無縛，其誰求解！無縛、無解，則無樂厭，是爲入不二法門」。珠頂王菩薩曰：「正道、邪道爲二，住正道者，則不分別是邪、是正。離此二者，是爲入不二法門」。樂實菩薩曰：「實、不實爲二，實見者尚不見實，何況非實？所以者何？非肉眼所見，慧眼乃能見，而此慧眼無見無不見，是爲入不二法門」。

釋 此文自成三十一章。一、法自在無生門：一切法起於生而不起於不生，故此端爲根本法門。悟無生法性名爲法自在，乃空分別法執而見法空真如者也。凡愚分別，聞不生即執之爲滅，不知滅因生有，先有生故後乃有滅。若推

觀諸法生處不可得，了見法性本未有生，生且無有，安從有滅？故不生者非謂滅也。滅者與生相待，今日不生，實以諸對待法起於生，不生則諸對待法皆本未嘗有，故入不二法也。二、德守無我門：德守者，真如守其性，不隨無明妄動起我我所見也。三、不眴不受門：眴、目動也。目者、六根之首，不眴者六根不觸受六塵，根不接塵，則識不起而諸法空寂矣。四、德頂實性門：頂者、最高最貴之義，故德頂即一切法實性。從實性以觀之，則生死煩惱垢之實性，即菩提、涅槃淨之實性。五、善宿不動門：宿者、本有，善者、淨觀。善宿者、本覺也。無明妄動有心念生，心念生則諸分別起，二者分別之端，此以本覺不動故不二也。六、普眼平等門：普眼者、一相無相平等徧照也。七、妙臂心空門：臂雖有二，而同爲法身之妙用。猶大、小乘心相如幻，空無自性。出此數例，餘可類推。

無相際、謂無善、不善相之實際。有漏、謂雜染法，無漏、謂清淨法。漏者、過失之義。有爲、無爲之爲，是造變義。有爲是無常義，故生、異、滅之

三相謂之有爲相。諸不徧者必不常住，不常住者必非其實，故無爲是徧、常、眞實之義。那羅延、是堅固之義，或翻金剛。四種異、空種異，指四大之種異虛空之種。謂四大是有質礙，虛空是無質礙也。了皆即心爲性，但有名言都無實性，則不二矣。身滅、謂證涅槃，不受後有。隨拈一法皆成二相，即由二相以契不二，是謂入不二門。

紀 法自在菩薩段中，得此無生法忍句：以三世推之，亦畢竟無生，此即是無生法性；能見此無生法性者，得無生法忍；得無生法忍者，便入不二法門也。

不眴菩薩段中，眴之一字，爲目動貌。眼爲六根之首，而受色塵，故有所受。受，又分境界受、自性受。

德頂菩薩段中，見垢實性二句：：以實性即是佛性，故無垢淨。

善宿菩薩段中，不動則無念二句：謂動念皆由無明，倘無無明長養習氣種子，即無名言一切分別。

普眼菩薩段中，一相無二相句：謂一一相即種種相，實本無相，相相無邊。若爲有相，相皆一合——金剛云：即是一合相，一合相者，即是不可取、不可說——故曰入平等。

妙臂菩薩段中，觀心相空如幻化四句：謂承上一乘而說爲二。菩薩、聲聞猶一身而有兩臂，不過爲善巧方便之妙用，更無分際可得。

弗沙菩薩段中，入於無相際而通達者句：謂無善與不善，分別對待之實際相可得也。

師子菩薩段中，以金剛慧三句：喻具有堅利之性——堅則妄想不破之，利則能破諸妄想——，解脫之能——此專屬智者；此解脫非謂縛而後解，謂本來無縛也。

師子意菩薩段中，不起漏不漏想二句：一切能招未果之業法，爲漏；無上正等覺及涅槃，爲無漏。無此有漏、無漏二法念，及此有漏、無漏二法相也。

那羅延菩薩段中，世間性空句：謂亦如諸法體性本空。對於世間，亦本無

出、入，故不溢不散。不溢屬入世，不散屬出世。

善意菩薩段中，若見生死性二句：正謂無實體相，因虛妄顛倒有。其實不入生死，不入涅槃，故無縛無解。

現見菩薩段中，盡若不盡四句：世法，謂皆不緣起，名盡。今佛法，若究竟隨緣不變，不變隨緣。多謂隨緣者爲無盡相，豈知不變者亦無盡相也，故曰皆是無盡相。

普守菩薩段中，我尚不可得四句：謂佛因衆生執我而說無我法，其實本無自體，當體空寂之性，即是恆沙之性，故曰見我實性，不復起二。

喜見菩薩段中，色即是空七句：見五塵皆是心相，各由見分而顯。心相，亦名自心相分。如鏡中之影相，並無自體，體即鏡之光明，均即是空。

明相菩薩段中，四種性即是空種性四句：如謂地大種性爲堅，水大種性爲溼，火大種性爲業，風大種性爲力，本不離四大而有空，亦不能離前後而有中間也。

妙意菩薩段中，眼性於色三句：謂眼性即同於色性，本無三毒——順境貪，背境恚，中境癡也，當體是空。

無盡意菩薩段中，布施迴向一切智二句：謂大布施者，三輪體空。如無能布施之我，亦無所受布施之人，中間布施之物亦無，即爲修波羅密多布施法，亦即是迴向一切智。故曰：布施性即是迴向一切智性。能迴向此佛智，則所修爲無漏法；不迴向，則所修爲有漏法。淨土念佛，發願往生外，亦注重迴向者，同此義。

深慧菩薩段中，則無心意識句：謂皆不緣起，能緣取一切境界而行於思慮者，爲心、意、識，三者之同分義。識又專屬分別、知，意又專屬審察考慮，心又專屬結合含藏，爲心、意、識三者之別分義。其實即於一切法上，求其實體，則畢竟是空，皆離於分限而爲無相，更無造作可得，故言無相、無作。

寂根菩薩段中，佛即是法二句：見三寶雖有同體、事相、自性之名，兩足、離欲、衆中三尊之號。事理因緣都歸自性，自性眞如，本體空寂。三寶皆爲

無相句：謂無能所皈依義。與虛空等句：謂周徧廣大義。

心無礙菩薩段中，見身實相者四句：謂了法性本空。但阿羅漢先滅煩惱，尚遺身縛。後滅果報，始灰身泯智。身為積聚義，四大所積聚故。生滅相續曰積，衆法和合曰聚。更如地球，爲無數微塵結成，是本無有相，當體空寂之眞如相故，即是身滅無可滅故。前寂根爲八地菩薩，此心無礙爲九地以上菩薩。能離所緣境礙，未斷能緣心礙，必至九地以上菩薩，則能所、心境皆無礙矣。

上善菩薩段中，身口意善四字：身、口、意爲三業。身業有三：殺、盜、淫。口業有四：惡口、兩舌、妄言、綺語——一切戲謔詼諧皆屬之。意業亦三：貪、瞋、癡。總爲十惡，反之爲十善。造作不失名業。是三業無作相二句：見三業體即眞如，更無一法可得。

福田菩薩段中，福行二字，指三善道業。罪行二字，指三惡道業。不動行三字，指專修四禪定者。屬於色界、無色界。三行實性是空句：見一一功德習染之相，皆爲如來藏清淨法身總相之全體，重重無盡。得此實性，便爲無上行

。華嚴菩薩段中，見我實相者二句：謂所有對待，皆由我執而起，無我則無分別法。則無有識句：即是無有分別。如梁武帝問對朕者誰，達摩祖師答以不識是。

月上菩薩段中，闇與明三字，各有心與境之區別。屬心之闇者，爲無明。其明者，爲觀照。屬境之闇者，爲不見處。其明者，爲見處。平等入，謂入於無明無闇耳。

寶印手菩薩段中，謂欣樂涅槃，則涅槃雖出世淨妙法，一變而爲世間染污法矣。若有縛則有解四句：謂必先有煩惱生死之苦累，而後方說脫此生死之苦，煩惱之累。如三祖初參二祖時，求爲解脫。二祖謂：誰縛汝，三祖悟本來無縛，又將誰解是。

珠頂菩薩段中，住正道者二句：謂如來本爲邪道不得已而說正道，使世無邪道，如來亦不說正道。

樂實菩薩段中，非肉眼所見四句：謂吾人肉眼平時之見，多係對境而顯。境滅時見亦隨滅，均屬法塵分別影事。尚有不見之見真如慧眼在，此真見者，非對境故，故無見不見也。例如空觀所見空相，尚非平等法性，以有所見故。如摩訶般若波羅密多照見五蘊皆空時，便爲無見無不見，無對境故。

壬二 遣言入不二法門

「如是諸菩薩各各說已，問文殊師利：『何等是菩薩入不二法門』？文殊師利曰：『如我意者，於一切法無言、無說、無示、無識，離諸問答，是爲入不二法門』」。

釋 一法之可言說者皆二，由二契應不二，即是由言以入無言。由種種言以入無言，則種種言莫非無言、無說、無示、無識。諸問答皆所不能到，莫非不二，斯真不二。正以諸菩薩皆宗極文殊師利，故在文殊師利之意，二入不二爲二，本無有二，莫非不二，始入不二法門。

紀

此章，以言遣言也。如我意者五句：是當時文殊無有文字言語，尚遺

此文字言語之相。此經文殊爲了因佛性——佛性三種：一、正因佛性，二、了因佛性，三、因緣佛性——，在契應不二究竟佛心也。

壬三 無言入不二法門

「於是文殊師利問維摩詰：『我等各自說已，仁者當說！何等是菩薩入不二法門』？時維摩詰默然無言。文殊師利歎曰：『善哉！善哉！乃至無有文字語言，是真入不二法門』」。

釋 諸菩薩入不二法門，悉無二言也。而各言其由以入不二，是從無言而言其言言無言也。所言既窮，維摩詰乃即於其所言之言，契會塵間。故諸菩薩皆入二門，而維摩詰則爲不二。文殊師利歎爲真入不二法門，所謂「動容揚古路，不墮悄然機」者也。然知文殊師利之獨歎維摩詰，不知維摩詰之所默，即是諸菩薩之所言，與徧歎諸菩薩無異，是猶未悟不二者也。諸菩薩從無言而言，維摩詰從言而無言，則因此經本以維摩詰爲正因佛性，法會大眾爲緣因佛性，文殊師利爲了因佛性，故此不二法門始於淨名之問，終於淨名之默，獨以維

摩詰示無言之宗極也。

【紀】 此章，遣無可遣也。默然無言句：不著一字，顯當時淨名無有文字言語，實離文字言語之相，斯真不二。此經淨名爲正因佛性，尤爲殊勝難能，亦固其所。且舉前次諸品，維摩詰所說種種方便、神通、智慧、圓妙之法，皆各顯其能，各盡其妙；今一爐而冶之，皆默契於此章無言中，實顯佛說無法可說之真旨。通常三乘相共之法，有從有門入者，有從無門入者，更有從亦有亦無門入者，又有從非有非無門入者。但皆契入於無言，乃爲真見法性。即進而推之大乘不共法，其宗極究竟處，亦是在契入此無言法性中耳。

辛三 時眾獲益

「說是入不二法門品時，於此眾中五千菩薩皆入不二法門，得無生法忍」。

【釋】 此中入不二法門，得無生法忍，是登初地。

庚二 香積佛品